



**BOSNA I HERCEGOVINA**  
**VIJEĆE MINISTARA**  
*Generalno tajništvo*

Broj: 05-50-1-2778/13  
Sarajevo, 11.12.2013. godine

05-50-1  
4

**PARLAMENTARNA SKUPŠTINA BiH**

*- Zastupnički dom -*

**SARAJEVO**

**BOSNA I HERCEGOVINA**  
**PARLAMENTARNA SKUPŠTINA BOSNE I HERCEGOVINE**  
**SARAJEVO**

PRIMLJENO: 12.12.2013

Organizaciona jedinica	Klasifikaciona oznaka	Redni broj	Broj priloga
		01-50-1-15-53	13

**PREDMET:** Odgovor na zastupničko pitanje – dostavlja se

Vijeće ministara Bosne i Hercegovine, na 75. sjednici održanoj 11.12.2013. godine, utvrdilo je Odgovor na zastupničko pitanje koje je postavio Zijad Jagodić, zastupnik u Zastupničkom domu Parlamentarne skupštine Bosne i Hercegovine.

U privitku prosljeđujemo Odgovor radi njegovog dostavljanja zastupniku.

S poštovanjem,

**GENERALNI TAJNIK**  
*Zvonimir Kutleša*



**BOSNA I HERCEGOVINA  
VIJEĆE MINISTARA**

Broj: 05-50-1-2778/13  
Sarajevo, 11.12.2013. godine

Zijad Jagodić, poslanik u Predstavničkom domu Parlamentarne skupštine Bosne i Hercegovine, na 53. sjednici Predstavničkog doma održanoj 19. septembra 2013. godine, postavio je sljedeće poslaničko pitanje:

„Šta MO BiH čini u pogledu:

- sanacije, adaptacije i odgovarajućeg osiguranja postojećih vojnih objekata koji su u stalnoj upotrebi;
- kvalitetnijeg vodosnabdijevanja svih objekata;
- sigurnosti, osiguranja modernizacije transportnih sredstava u OS BiH;
- obnove i modernizacije IKT sredstava u OS BiH;
- standarda svih zaposlenika u OS BiH;
- uspostave odgovarajućeg obrazovnog centra za pripadnike OS BiH (oficire, podoficire i vojnike).“

Na postavljeno pitanje, Vijeće ministara Bosne i Hercegovine je na 45. sjednici održanoj 11. 12. 2013. godine, utvrdilo sljedeći

**ODGOVOR**

- Na perspektivnim vojnim lokacijama nalazi se 1551 objekat sa ukupnom površinom od 605.447m<sup>2</sup>. Uzme li se u obzir trenutna građevinska vrijednost objekata od 600 KM/ m<sup>2</sup> (procjena), ukupna vrijednost objekata iznosi 363.268.200,00 KM. Ako se uzme vrijednost zakonom utvrđenog finansijskog izdvajanja u visini od 0,50% građevinske vrijednosti objekata, samo na ime redovnog održavanja objekata visokogradnje na godišnjem nivou je potrebno izdvojiti 1.816.341,00 KM.

Površina zemljišta na perspektivnim lokacijama iznosi ukupno 230.419,806 m<sup>2</sup>. Ukoliko se uzme minimalna procjena od 0,01 KM/ m<sup>2</sup>, vrijednost osnovnog održavanja na ime kompletne infrastrukture, protivpožarne zaštite, zaštite okoline iznosi cca. 2.304.000,00 KM. Iz navedenog proizilazi da za osnovno održavanje objekata i infrastrukture na perspektivnim vojnim lokacijama godišnje treba izdvojiti 4.120.000,00 KM.

U 2012. godini je za osnovno održavanje planirano 1.154.800 KM (objekti i infrastruktura), dok je u 2013. godini po ovom osnovu planirano izdvajanje od 589,800 KM. U 2014. godini planirano je 80.000 KM za hitne intervencije na vodovodnoj i kanalizacionoj mreži i 119.000 KM za hitne građevinsko-zanatske radove.

Treba napomenuti da u građevinarstvu, pored redovnog postoji i investicijsko održavanje, koje budžetski korisnici provode sa ekonomskog koda 821600. Prilikom planiranja budžeta Ministarstva odbrane BiH, finansijska sredstva na tom ekonomskom kodu su zanemariva uzme li se u obzir broj, starost i višegodišnje neodržavanje objekata. Za ovu namjenu u 2012. godini sredstva nisu planirana; u 2013. godini planirano je 423.000 KM, a 2014. planirano je 700.000 KM.

Ukoliko se u budućnosti planiranje sredstava na ime redovnog i investicijskog održavanja objekata i infrastrukture Oružanih snaga BiH nastavi kako je to bilo u dosadašnjem periodu, Ministarstvo odbrane i Oružane snage BiH doći će u situaciju da će u skorijoj budućnosti (5 do 7 godina) trebati daleko veća izdvajanja za dovođenje objekata i infrastrukture u stanje kakvo je bilo u periodu 2000-2005. godina.

Obzirom da Bosna i Hercegovina teži ulasku u NATO, mora se voditi računa o potrebi modernizacije infrastrukture i objekata, kao i podizanja stepena funkcionalnosti istih na veći nivo, što iziskuje znatno veća izdvajanja za ovu namjenu.

- Vodosnabdijevanje objekata Oružanih snaga BiH uglavnom se vrši putem javnih preduzeća koja se bave vodosnabdijevanjem u mjestima u kojima se nalaze objekti Oružanih snaga BiH i sa istima su sklopljeni ugovori za opskrbu vodom.

Na lokacijama Oružanih snaga BiH koje se snabdijevaju vodom iz vlastitih izvorišta, redovno se vrše kontrole kvaliteta pitke vode i poduzimaju potrebne radnje i mjere s ciljem zaštite vodocrpilišta. Navedene aktivnosti se provode u okviru odobrenih finansijskih sredstava. Na lokaciji "Dubrave" Tuzla, koja se snabdijeva vodom iz sopstvenog vodocrpilišta, tokom 2013. godine izvršena je nabavka i pušten u rad sistem filtera za otklanjanje teških metala.

- Sigurnost saobraćaja u Oružanim snagama BiH uslovljena je sa više faktora, između ostalog saobraćajnom infrastrukturom, nedostatkom i zastarjelošću motornih vozila. Poseban problem predstavlja održavanje motornih vozila koja su u okviru odbrambene saradnje donirana Oružanim snagama BiH od drugih zemalja, a za koje je otežana ili nije moguća nabavka rezervnih dijelova.

Imajući u vidu navedeno, u okviru Ministarstva odbrane i Oružanih snaga BiH razmatrana je modernizacija transportnih sredstava kroz nabavku savremenih vojnih vozila i transportne opreme. Osnovna ograničenja u ovoj oblasti su: nedovoljan budžet odbrane, ograničenja u Zakonu o javnim nabavkama, kao i činjenica da nije okončan proces izrade Pregleda odbrane kao ključnog dokumenta za modernizaciju Oružanih snaga BiH.

Takođe, na nivou Ministarstva odbrane BiH izrađena je analiza stanja po saobraćaju za period 2008-2012 godina. Ova analiza će služiti kao osnova za izradu idejnog projekta kapitalnog ulaganja u modernizaciju transportnih sredstava. Idejni projekat će se odnositi na neutrošena budžetska sredstva u periodu do 2016. godine, a kako bi ista bila implementirana za modernizaciju transportnih sredstava. Po izradi, idejni projekat će biti upućen na odobravanje Vijeću ministara BiH.

- Najvažnije realizirane aktivnosti na modernizaciji IKT sredstava Oružanih snaga BiH su sljedeće:
  - uspostavljen je Operativni centar za komandu i kontrolu u insitucijama odbrane BiH. Centar posjeduje sve potrebne servise za podršku sistema komande i kontrole. Opremanje Centra je finansirano sredstvima Vlade SAD sa oko 6 miliona US \$,
  - nabavljena su najmodernija taktička i borbena komunikacijska sredstva kompanije HARRIS u vrijednosti 4,3 miliona US\$. Projekt je finansirala Vlada SAD,
  - nabavljeni su višenamjenski satelitski terminali kompanije HARRIS. Projekt je finansirala Vlada SAD,
  - u Oružanim snagama BiH instalirana je moderna radiokomunikacijska oprema proizvedena od strane turske kompanije ASELSAN,
  - upotrijebljeni su IKT sistemi za razmjenu povjerljivih podataka sa NATO i NATO vođenim mirovnim misijama,

- uspostavljen je jedinstven telefonski sistem u Ministarstvu odbrane i Oružanim snagama BiH,
- uspostavljena je prostrana računarska mreža (WAN) Ministarstva odbrane i Oružanih snaga BiH, koja povezuje glavne lokacije Oružanih snaga BiH. Ove lokacije međusobno su konektovane preko mreže institucija BiH,
- uspostavljen je sistem za upravljanje elektromagnetnim spektrom za potrebe Oružanih snaga BiH,
- uspostavljena je HF radio mreža za rad u nepredviđenim situacijama,
- uspostavljena je VHF radiomreža za rad u pokretu i praćenje vojnih transporta.

Pored navedenog, u toku su aktivnosti na realizaciji:

- projekta uspostave informacionog sistema za podršku procesa upravljanja personalom. Sistem je baziran na ORACLE tehnologiji.
  - projekta uspostave sistema za podršku poslovnih procesa i upravljanja dokumentima u Ministarstvu i Oružanim snagama BiH,
  - modernizacije postojećih lokalnih računarskih mreža (LAN) na lokacijama komandi Oružanih snaga BiH.
- Standard zaposlenika u Oružanim snagama BiH posmatra se na dva načina. Prvo, kao lični standard ili životni standard zaposlenika, kao kategorije koja obavlja specifične vrste poslova. Pri tome, često se radi o poslovima sa uvećanim rizikom i izloženosti opasnostima po život i zdravlje, što podrazumijeva finansijsku nadoknadu u vidu plate i naknada, kao i određene beneficije i pogodnosti koje su srazmjerne stepenu ugroženosti života i zdravlja pripadnika Oružanih snaga BiH.

Drugi vid standarda pripadnika Oružanih snaga BiH ogleda kroz uslove smještaja, boravka, opremljenosti i rada pripadnika Oružanih snaga BiH na lokacijama njihovog razmještaja u BiH, za vrijeme angažovanja u misijama podrške miru i u zonama gdje se izvode borbene operacije.

U oba slučaja standard pripadnika Oružanih snaga BiH uslovljen je rješenjima sadržanim u važećoj zakonskoj regulativi i raspoloživim finansijskim sredstvima.

Kada je u pitanju lični ili životni standard zaposlenih u Oružanim snagama BiH, postojeći zakonski okvir prepoznaje ovu kategoriju kao zasebnu u Zakonu o plaćama i naknadama u institucijama BiH i podzakonskim aktima donesenim na osnovu istog zakona propisujući plaće, naknade i dodatke za profesionalna vojna lica, na način da se vrednuje stepen složenosti poslova i stepen izloženosti opasnostima i troškovima pojedinaca u vršenju njihove službe.

Sva profesionalna vojna lica koja imaju povećan stepen izloženosti opasnosti po život i zdravlje kao što su: demineri, vojni letaći, lica koja rade na uništavanju neeksplozivnih ubojnih sredstava, lica koja rade na delaboraciji municije i lica koja rade na visinskim objektima ostvaruju pravo na dodatak po tom osnovu.

Pored navedenog, Zakon o službi u Oružanim snagama BiH propisuje staž sa uvećanim trajanjem, i to: za vojnike, podoficire i oficire za 12 mjeseci rada 16 mjeseci penzijskog staža, a za generale za 12 mjeseci rada 18 mjeseci penzijskog staža.

Imajući u vidu stručne kvalifikacije koje moraju posjedovati pripadnici Oružanih snaga BiH, uslove i način obavljanja zadataka, te rezultate koje ostvaruju, posebno u oblasti deminiranja, pomoći civilnim strukturama i angažovanju u operacijama podrške miru, evidentno je da standard pripadnika Oružanih snaga BiH i pored naprijed navedenih pogodnosti nije na nivou koji bi ovu kategoriju izdvojio od prosječnog standarda ostalih zaposlenika u institucijama BiH, bez obzira na neuporedivo teže uslove rada.

Drugi vid standarda pripadnika Oružanih snaga BiH, koji se odnosi na smještaj, boravak, opremljenost i rad u jedinicama nije na zadovoljavajućem nivou.

Nakon formiranja Oružanih snaga BiH od dvije entitetske vojske, koje su u velikoj mjeri imale različite standarde u pogledu naprijed navedenih elemenata, pristupilo se ujednačavanju i standardizaciji uniformi, opreme, smještajnih prostora i svih sredstava na korištenju u Oružanim snagama BiH.

Ovi procesi su uslovljeni i objektivnim okolnostima da pored naslijeđa različitosti iz entitetskih vojski Oružane snage BiH uz različite vidove pomoći prijateljskih zemalja imaju dodatne zahtjeve ili prijedloge za uvođenjem standarda koji su svojstveni tim zemljama.

Trenutno je standard pripadnika Oružanih snaga BiH po pitanju uslova za smještaj, boravak, opremljenost i rad u jedinicama, zbog nedostatka dijela regulative i finansijskih sredstava što za posljedicu ima i nedovoljnu tehničku opremljenost, na nivou da se otežano i uz velike napore izvršavaju redovne obaveze.

Određivanjem postojećeg fiskalnog okvira i visine budžetskih sredstava namijenjenih za odbranu koja se u posljednje tri godine konstantno smanjuju, standard pripadnika Oružanih snaga BiH ima opadajući trend. Sredstava za opremanje i poboljšanje uslova za smještaj, boravak, opremljenost i rad u jedinicama su nedovoljna, a što je suprotno tendencijama postizanja nivoa standarda koji imaju zemlje članice NATO saveza prema kojem Bosne i Hercegovina ide.

Ministarstvo odbrane i Oružane snage BiH konstantno poduzimaju mjere da se normativno uredi sve oblasti koje se odnose na pitanja standarda pripadnika Oružanih snaga BiH, te da se uz racionalno korištenje raspoloživih sredstava stvore što bolji uslovi za život i rad iako je preduslov za sistemsko i trajno rješavanje ovih pitanja izdvajanje dodatnih sredstava namijenjenih za poboljšanje standarda pripadnika Oružanih snaga BiH i njihovo pozicioniranje u budžetu Ministarstva odbrane BiH.

Imajući u vidu veličinu Oružanih snaga BiH i ograničeni budžet odbrane, uspostava posebnog obrazovnog centra za oficire, podoficire i vojnike, i pored postojanja takve inicijative, nije ocijenjena kao svrsishodna.

U sastavu Komande obuke i doktrine Oružanih snaga BiH postoje i funkcioniraju centri u kojima se vrše obuke i edukacija pripadnika i kandidata za prijem u Oružane snage BiH, po sljedećem:

- a) Centar za osnovnu obuku kandidata Pazarić. U ovom centru obučavaju se kandidati za prijem u Oružane snage BiH. Po završetku tromjesečne obuke kandidati se primaju i raspoređuju u jedinice Oružanih snaga BiH,
- b) Centar za profesionalni razvoj podoficira i oficira Travnik. U ovom centru provodi se pojedinačna edukacija i obuka podoficira i oficira, kroz osnovne i napredne podoficirske kurseve i kurseve stranih jezika,
- c) PSOTC Butmir. U centru, kroz nekoliko oblika seminara i kurseva obučavaju se pripadnici Ministarstva odbrane BiH, Oružanih snaga BiH, civilnih institucija BiH i pripadnici prijateljskih zemalja za sudjelovanje u operacijama podrške miru,
- d) Centar za borbenu obuku i Simulacijski centar Manjača. U ovim centrima provode simulacijske i borbene vježbe komandi i jedinica Oružanih snaga BiH, u kojima se jedinice i komande uvježbavaju za izvršenje svih zadataka iz misije Oružanih snaga BiH.,

Komanda obuke i doktrine Oružanih snaga BiH u Travniku trenutno provodi pilot projekat, kojim se kroz javni konkurs prikupljaju prijave lica koja su u civilnom školstvu završili sedmi stepen školovanja i posjeduju odgovarajući nivo znanja engleskog jezika. Kandidati koji nakon testiranja uspješno zadovolje tražene kriterije (u prvom ciklusu 32 kandidata) biti će primljeni na devetomjesečnu vojnu obuku. Svi koji uspješno završe obuku biti će primljeni u Oružane snage BiH u činu potporučnika.

Pored navedenog, kroz programe bilateralne saradnje pripadnici Oružanih snaga BiH školuju se i u inostranstvu, na odgovarajućim vojnim školama i akademijama. Školovanje, edukacija i uvježbavanje pripadnika Oružanih snaga BiH provodi se u skladu sa standardima i programima koji su kompatibilni sa standardima zemalja članica NATO.